

Quechua: Cuzco Luke

1

Ancha respetasqa Teófilo, Diosmi ñoqayku ukhupi imaymanata ruwarqan. Qallariymantapacha chaykunata rikuqkunanan llapanta willawarqanku, paykunaqa Diosmanta allin willakuykunata willaqkunanan karqanku. Askha runakunanan atisqankuman hina chaykunata allin wakichisqata qelqarqanku. Chaykunatan ñoqaqa qallariyinnimanta allintapuni t'aqwirqani, hinaspan yuyaykurqani allin wakichisqa willakuyta qanman qelqamuyta, chay hinapin yachanki yachachisqasuykiqa cheqaqpuni kasqanta.

Judea hap'iypi rey Herodes kamachikusqan tiempopin, Abiaspa t'aqan sacerdotekunamanta huk sacerdote Zakarías sutiyuq karqan, warmintaq Aaronpa mirayninmanta Elisabet sutiyuq karqan. Iskayninkutaq Diospaq chanin karqanku. Paykunaqa kasukuqkun Señor Diospa lliw kamachikuyninkunatapas, unanchayninkunatapas, ahinapin mana huchachanata kawsaoku. Mana wawayoqtaq karqanku Elisabet mana wachakuq kasqanrayku, iskayninkupas yuyaqañan karqanku. Yupaychana wasipi t'aqanman ruwana tupamuqtinmi Zakariasqa huk kuti Diospa qayllanpi servishaqtin, sacerdotekunaq ruwananman hina, sorteopi Zakariasman tuparqan Señor Dios yupaychana wasi Ch'uya Cheqasman haykuspa inciensota q'osñichinanpaq. Llapan runakunataq incienso q'osñichina horata Diosmanta patiopi mañakusharqanku. Hinaqtinmi Señor Diospa angelninqa Zakariasman rikhurirqan incienso q'osñichina altarpa paña ladonpi sayashaq. Zakariastaq payta rikuspa mancharisqa muspharqanraq. Hinan angelqa payta nirqan: Zakarías, ama mancharikuychu, mañakusqaykitaqa Diosmi qosunki, warmiyki Elisabetmi qhari wawata wachakunqa, hinan Juanta sutichanki. Anchatapunin kusichisunki, askhataqmi nacesqanmantaqa q'ochukunqaku. Diospa ñawpaqenpin ancha reqsisqa kanqa. Manan vinotapas ima machanatapas ukyanqachu, mamanpa wixsanpi kashasqanmantapachan Santo Espirituwan hunt'a kanqa. Askha Israel runakunatan Señor Diosninkuman kutirichinqa. Juanqa Señorpa ñawpaqentan ringa profeta Elías hina ancha kallpayuq atiyuniyoq ima. Paymi taytakunata wawakunatawan allipunachinqa, mana kasukuqkunatapas chaninta kawsanankupaq yachachinqa. Ahinatan runakunata wakichinqa Señorta chaskinankupaq, nispa. Zakariastaq angelta nirqan: ¿Imaynapitaq niwasqaykiqa cheqaq kasqanta yachasaq? Ñoqaykuqa sinchi machupayañan kayku, nispa. Chaymi angelqa payta nirqan: Ñoqaqa Diospa kamachin Gabrielmi kani, paymi qanman rimaykuspa kay kusikuy simikunata willaykunaypaq kachamuwan. Qanman nisqay simikunaqa tiemponpipunin hunt'akunqa, qanmi ichaqa mana creenkichu, chayraykun upayanki, manan rimayta atinkichu wawayki nacemunankama, nispa. Chaykamataq runakunaqa Zakariasta hawapi suyasharqanku. Paykunaqa Dios yupaychana wasipi unayta kamuqtinmi muspharqanku. Lloqsimuspataq, paykunata mana rimapayayta atirqanchu, chaymi repararqanku Dios yupaychana wasipi rikhuriyta rikusqanta. Payqa upayapuspanmi makillanwanña rimarqan. Yupaychana wasipi servinan p'unchaykuna hunt'akuqtintaq wasinta ripurqan. Chaykuna qhepatataq warmin Elisabetqa wixsallikapurqan hinaspan phisqa killata

wasillapi karqan. Payqa nirqanmi: Kay hinatan Señor Diosqa khuyakuwaspa ruwawan runakunaq p'enqawasqanta ch'inyachinanpaq, nispa.

Soqta killa onqoqña Elisabet kashaqtinmi, Diosqa ángel Gabrielta kacharqan, Galilea provinciapi Nazaret nisqa llaqtapi tiyaq María sutiyoq doncella sipasman, paymi Davidpa mirayninmanta José sutiyoq qhariwan casarakunanpaq rimaykusqaña kasharqan. Chay sipaspa kashasqanman haykuspataq angelqa nirqan: ¡Diospa ancha saminchasqan warmi, napaykuykin! Señor Diosmi qanwan kashan, nispa. Paytaq ichaqa angelpa rimapayasqanmanta muspharqan, sonqonpitaq tapukurqan: ¿Imataq chay rimaykuyri? nispa. Hinaqtinmi angelqa payta nirqan: María, ama mancharikuychu, Diosmi sumaqta qhawarimusunki. Kunanmi wiksallikunki, hinaspan huk qhari wawata wachakunki, paytan Jesusta sutichanki. Paymi allin reqsisqa kanqa, Qollana Diospa Churin nisqan kanqa. Señor Diosmi machulan Davidpa kamachikunanpi churanqa. Hinan Jacobpa mirayninta wiñaypaq kamachinqa, kamachikuynintaq mana tukukuq kanqa, nispa. Chaymi Mariaqa angelta nirqan: Qhariwan manaraq kashaspayqa, ¿imaynataq wawayoq kayman? nispa. Angeltaq payta nirqan: Santo Espiritun qanman uraykamunqa, Qollana Diosmi atiyinwan p'istuykusunki, chaymi naceq wawaqa Diospaq t'aqasqa kanqa, Diospa Churin sutichasqataq kanqa. Aylluyki Elisabetpas yuyaqkayninpiñan qhari wawata wiksallikun. Paytaqa "Mana wachakuq" nirqankun, ichaqa kunanwanmi soqta killaña wiksallikusqan. Diospaqqa manan imapas mana atikuqqa kanchu, nispa. Chaymi Mariaqa nirqan: Señor Diospa warmi kamachinmi kani, nisqaykiman hina Diosqa ñoqawan ruwachun, nispa. Angeltaq qayllanmanta ripurqan.

Chay p'unchaykunapin Mariaqa Judea orqoorqoneqpi huk llaqtaman usqhaylla rirqan. Zakariaspa wasinman haykuspataq Elisabetta napaykurqan. Mariaq napaykusqanta Elisabet uyariqtin hinataq, wixsanpi wawaqa "wat'ak" nirqan. Hinan Santo Espirituqa Elisabetman hunt'aykurqan, chaymi kunkayoqta nirqan: Llapan warmikunamanta aswan saminchasqan kanki, saminchasqataqmi qanmanta naceq wawapas. Ñoqapaqqa ancha samin Señorniypa maman watukamuwayninqa. Napaykuwasqayki simita uyariqtiy hinan, wixsaypi wawaqa kuisqa "wat'ak" nirqan. Señor Diospa nisqasuykin hunt'akunqa, chayta creespan kuisamiyoq kanki, nispa.

Chaymi Mariaqa nirqan: Almaymi Señor Diosta hatunchan, sonqoytaq Qespichiqniy Diospi kusikun. Kay kamachin wakcha warmitan qhawariwarqan, kunanmantaqa lliw miraykunan "kuisamiyoqmi" niwanqa, hatuchaqkunata Atiyiniyoq Dios ruwapuwasqanrayku. Ch'uya nisqan sutiyaq. Diosqa manchakuqninkunatan miraymiraykama khuyapayan. Makinwanmi atiyininta rikuchirqan, anchaykachaqkunatan ch'egechirqan. Atiyiniyoqkunatan kamachikushaqtin wikch'urqan, wakchakunataq hoqaripa hatuncharqan. Yarqasqakunatan allinkunawan saksachirqan, qhapaqkunataq mana imayoqta kutirichirqan. Kamachin Israeltan yanaparqan, Abrahamta miraynintawan khuyapayashanallanpaqmi yuyarirqan machulanchiskunaman prometesqanman hina, nispa. Mariataq kinsa killata hina Elisabetwan qhepakurqan, chaymantataq wasinta kutipurqan.

Elisabetpa wachakunan killa hunt'akuqtintaq, qhari wawata wachakurqan. Chaymi wasimasinkuna ayllunkunapiwan Diospa ancha khuyapayasqanta uyarispa paywan kusikurqanku. Pusaq p'unchaymantan wawaq qharikaynin qarachata señalayman runakunaqa hamurqanku, hinaspan taytanpa sutin Zakariaswan sutichayta munarqanku. Chaymi mamanqa nirqan: Manan, Juanmi sutinga kanqa, nispa. Paytataq nirqanku: ¿Imanaqtin? Manan pipas aylluykipiqa chay sutiyoqqa kanchu, nispa. Hinaspanmi makillankuwan taytanta rimapayarqanku, ima sutiwanchus wawata sutichayta munasqanta. Hinan qelqana tablachata mañakuspa qelqarqan: Juanmi sutinga, nispa. Lliwtaq utirayarqanku. Chay ratotaq siminpas kichasqa qallunpas paskasqa kaqtin Diosta yupaychaspan rimarirqan. Hinan llapan wasimasinkuna mayta mancharikurqanku. Tukuy chaykunataq lliw Judea orqoorqokunapi willasqa karqan. Llapan uyariqkunataq chaykunata sonqollankupi yuyaykuspa nirqanku: ¿Pichá chay wawaqa kanqa? nispanku. Señor Diostaq wawawanpuni kasharqan.

Santo Espiritun Juanpa taytan Zakariasman hunt'aykurqan, chaymi profetizarqan: Israelpa Señor Diosninqa yupaychasqa kachun watukamuspan llaqtanta kacharichisqanmanta. Kamachin Davidpa mirayninmantataq atiyniyoq qespichiqa kachamuwanchis. Ch'uya profetankunawanmi Diosqa ñawpaqmantaña prometerqan awqanchiskunamanta qespichiwananchispaq' llapan cheqnikuwaqninchismanta kacharichiwananchispaq. Prometellarqantaqmi machulanchiskunata khuyapayanapaq, ch'uya rimanakuyninta yuyarikunanpaqwan. Diosmi machulanchis Abrahamman juraspa prometerqan awqanchiskunamanta kacharichisqa kananchispaq, paypa ñawpaqenpi ch'uyata chaninta kawsaspa lliw p'unchayninchiskunapi mana manchakuspa servinanchispaq. Qantaqmi, wawáy, Qollana Diospa profetan nisqa kanki, Señor Diospa ñawpaqenta ñanninkunata allichaspa rinki. Llaqtanpa huchankunatan pampachanqa, ahinapin paykunata qespichinqa, chaytan paykunaman willanki. Diosninchismi anchata khuyapayawaspanchis hanaq pachamanta Pachapaqariy k'anchaywan watukamuwasunchis, laqhayaqpi tiyaqkunatapas, wañuyta manchakuqkunatapas k'anchaykunapaq, allin kawsay ñanpi pusawananchispaq, nispa. Wawataq wiñasharqan yuyaytapas aswanaswanta hap'isharqan. Ch'inneqpitaq tiyarqan Israel llaqtaman rikuchikunan p'unchaykama.

2

Chay p'unchaykunapin hatun rey Augustoqa kamachikurqan llapa llaqtakunapi tiyaqkuna padronasqa kanankupaq. Kay runa yupayqa chayllaraqmi qallarirqan Siria suyupi sullk'a rey Kirenio kamachikushaqtin. Llapallataq padronasqa kanankupaq nacesqanku llaqtamankama rirqanku. Hinan Josepas Galilea provinciapi Nazaret llaqtamanta Judea hap'iyman wicharqan, Davidpa llaqtan Belenman, Davidpa mirayninmanta kasqanrayku. Chaymanqa rirqan paywan casarakunanpaq rimaykusqaña Mariawan yupasqa kananpaqmi, Mariaqa onqoqmi kasharqan. Paykuna chaypi kashaqtinkutaq wachakunan killaqa hunt'akurqan. Hinan phiwi qhari wawanta wachakurqan, walthanawan walthaykuspatay uywa qaranapi siriykachirqan paykunapaq tampupi mana campo kasqanrayku.

Belén Ilaqta qaylla campopitaq michiqkuna kasharqan uywankuta tutantin qhawaspanku. Chayllamanmi Señor Diospa angelninqa paykunaman rikhurirqan, Señorpa Iliphllikaynintaq paykunaman k'anchaykurqan, hinan sinchitapuni mancharikurqanku. Chaymi angelqa paykunata nirqan: Ama mancharikuychischu, ancha allin willakuytan willasqaykichis, chaywanmi llapa runa q'ochukunqa. Kunanmi Davidpa Ilaqtanpi huk Qespichiq nacepusunkichis, payqa Diospa Akllasqan Criston, payqa Señormi. Chayta yachanaykichispaqqa kay hinatan tarinkichis: Huk wawan walthanawan walthaykusqa uywa qaranapi siriycusqa kashanqa, nispa. Chayllamanmi angelwan hanaq pachapi askha angelkuna rikhurimurqan Diosta yupaychaspanku: ¡Diosqa hanaq pachapi yupaychasqa kachun! ¡Diospa khuyapayasqan runakunataq kay pachapi sumaqta kawsachun! nispa. Hanaq pachaman angelkuna kutipuytinkutaq michiqkunaqa ninakurqanku: Hakuchisyá Belén Ilaqtata, hinaspa rikumusun Señor Diospa willawasqanchis imachus kasqanta. Usqhaylla rispankutaq Mariata Josetawan, wawatapas uywa qaranapi siriycusqata tarirqanku. Chayta rikuspataq wawamanta angelpa paykunaman nisqanta willakurqanku. Chaymi llapan uyariqkuna muspharqanku michiqkunaq willakusqanmanta. Mariataq ichaqa chaykunata yuyaymanaspa sonqonpi allintapuni hap'irqan. Michiqkunataq uyarisqankuman hina tukuy imapas sucedesqanmanta yachaspanku, rikusqankumantawan Diosta hatunchaspa yupaychaspa kutipurqanku.

Pusaq p'unchayniyoq wawa kashaqtinmi qharikaynin qarachata señalarqanku, hinaspan wiksapi manaraq kamakushaqtin angelpa sutichasqan Jesús sutiwan suticharqanku. Moisespa kamachikusqanman hina wachakuqpa ch'uyanchakuynin p'unchay chayamuqtintaq, Mariaqa Josepiwan Jerusalén Ilaqtaman wawata aparqanku Señor Diosman presentanankupaq, ofrendatapas haywanankupaq. Señor Diospa kamachikuynin simipin nin: Llapa phiwi naceq qhari wawan Señor Diospaq t'aqasqa kanqa, nispa. Nillantaqmi: Iskay kullkuta otaq iskay malqo urpitapas haywanki, nispa. Jerusalén Ilaqtapin tiyarqan Simeón sutiyoq runa, paymi Dios yupaychaq chanin runa karqan, Israel runakunaq qespichisqa kanantataq suyasharqan. Santo Espiritun paypi karqan, chay Santo Espiritun payman willasqaña: Señor Diospa Akllasqan Cristota manaraq rikushaspaqa manapunin wañunkichu, nispa. Hinan Simeonqa Espirituq tanqarisqan Dios yupaychana wasiman haykurqan. Chaymanmi taytamamanqa Jesús wawata apamurqanku Diospa kamachikuyninman hina ruwanankupaq. Hinaqtinmi Simeonqa wawata marq'arikurqan, hinaspan Diosta yupaychaspa nirqan: Kunanqa, Señor Diosniy, nisqaykiman hina kamachiykiqa sonqopassonqo wañukapusaq. Ñan rikuniña kachamusqayki Qespichiqniykuta, llapa Ilaqtakunaq qayllanpi churasqaykita. Paymi mana Judío runakunaman k'anchaspa munayniykita reqsichinqa, Israel Ilaqtaykipaqtaq hatun sami kanqa, nispa. Hinan Josepas mamantas muspharqanku Jesús wawamanta imaymanata nisqankuwan. Simeontaq paykunata saminchaspan María mamanta nirqan: Qhawariy, Diosmi kay wawata Israelpi churan, wakin urmananpaq, wakintaq Diosman kutirikunanpaq. Diospa munayninta rikuchiqtinmi pay contra rimanqaku. Ahinapin paykunaq yuyaykusqan yachasqa kanqa. Llakikuymi espada hina t'urpuspa sonqoykita nanachinqa, nispa. Chaypiqa kashallarqantaqmi

Aser ayllumanta Fanuelpa ususin Ana, payqa karqan sinchi yuyaqña profeta warmi. Paymi doncellallaraq casarakusqanmantapacha qanchis watallata qosanwan tiyasqa. Pusaq chunka tawayoq watañan viuda karqan. Payqa Dios yupaychana wasimantan mana lloqsiqchu, tuta p'unchay ayunaspa rogakuspa Diosta yupaychaq. Chay warmin chay kikin horatapuni hamuspa Diosman graciasta qorqan, Jerusalén Ilaqtata awqankunamanta kacharichiyta llapan suyaqkunamantaq Jesús wawamanta rimarirqan.

Señor Diospa kamachikuy siminman hina lliwta hunt'aspataq, Galileaman kutipurqanku, Ilaqtanku Nazaretman. Wawataq wiñarqan, kallpachakurqan, yachaywan hunt'aykusqataq karqan, Diostaq payta allinpaq qhawarirqan. Taytamamantaq sapa wata Diospa Alqaspa Pasarparisqan Yuyarina Fiestapaq Jerusalén Ilaqtaman riqku. Jesús chunka iskayniyoq watayoq kashaqtinmi chay fiestapaq Jerusalén Ilaqtaman wicharirqanku, imaynan rillaqkupuni hinata. Chay fiesta tukukuyta kutimpushaqtinkun Jesusqa Jerusalén Ilaqtapi qhepakurqan, ichaqa Josepas mamanpas manan yacharqanchu. Hinan puriqkuna ukhupi Jesuspa rishasqanta yuyaspa huk p'unchay puriytaña rirqanku, hinaspan ayllunku ukhupi reqsinakuqmasi purapipas Jesusta maskhaykurqanku. Mana tarispataq qhepantin p'unchay Jerusalén Ilaqtaman kutirirqanku payta maskhaspa. Kinsakaq p'unchaypitaq Jesustaqa Dios yupaychana wasipi tarirqanku Diospa kamachikuyninta yachachiqkuna chawpipi tiyashaqta, Jesusqa paykunatan uyarisharqan tapusharqantaq. Llapan payta uyariqkunataq muspharqanku yachayninmanta kutichisqankunamantawan. Taytamamantaq payta rikuspa muspharqan, hinan mamanqa nirqan: Wawáy, ¿imaraykun kayta ruwawankiku? Qhawariy, taytaykipiwanmi khuyay llakisqa maskhaykamushaykiku, nispa. Chaymi paykunata nirqan: ¿Imapaqtaq maskhamuwarqankichis? ¿Manachu yacharqankichis Yayaypa ruwanankunapi kanayta? nispa. Taytamamantaq ichaqa mana entienderqankuchu chay nisqan simikunata. Paykunawan uraykuspataq Jesusqa Nazaret Ilaqtaman kutipuspa paykunaman kasukuspa tiyarqan. Mamanqa tukuy chaykunatan sonqollanpi waqaycharqan. Jesusmi wiñasharqan yachaypipas sayayninpipas, Diospas runakunapas sumaqtataq qhawarirqan.

3

Chunka tawayoq wata kurakña hatun rey Tiberio kamachikushaqtinmi, Roma Ilaqtayoq prefecto Poncio Pilatoqa Judea hap'iypi kamachikusharqan, Herodestaq Galilea provinciapi kamachikusharqan, Herodespa wawqen Felipetaq Iturea provinciapi Traconite provinciapiwan kamachikusharqan, Lisaniastaq Abilinia provinciapi kamachikusharqan. Anaswan Caifaswanmi uma sacerdotekuna kasharqan. Chaypachan Zakariaspa churin Juanman Diosqa ch'inneqpi rimaykurqan. Hinan Juanqa Jordán mayu tukuy chimpapurantinta purirqan:- Huchaykichista saqepuspa Diosman kutirikuychis, hinaspa bautizachikuychis huchaykichis pampachasqa kananpaq, nispa. Profeta Isaiasmi qelqarqan: Ch'inneqpin huk kunka waqyakun: ¡Allichaychis Señor Diospa ñanninta! ¡Cheqanyachiychis purinankunata! Llapa wayq'on hunt'achisqa kanqa, llapa orqopas moqokunapas pampayachisqan kanqa, q'ewi ñankunapas cheqanyachisqan kanqa, khallka ñankunapas llamp'uyachisqan kanqa.

Tukuy runataq Diospa kachamusqan qespichiqta rikunqa, nispan, nispa. Askha runakunan Juanwan bautizachikunanpaq rirqan, hinan Juanqa paykunata nirqan:- ¡Yaw runakuna, mach'aqway hinan kankichis! ¿Pin willarqasunkichis Diospa kachamunan ñak'ariymanta ayqeyta? Diosman kutirikuspaykichis kawsayniykichis t'ikrasqa kasqanta rikuchikuychis, amataq niychischu: Abrahampa mirayninmi kayku, nispaqa. Ñoqaqa niykichismi Diosqa kay rumikunamantapas atinmi Abrahampa wawankunata hatarichiyta. Sach'a wit'uqqa wit'unan patapiñan kashan. Chaymi tukuy mana allin ruruq sach'aaqa wit'usqa kaspas ninaman wikch'uykusqa kanqa, nispa. Chaymi runakunaqa Juanta tapurqanku:- Chay hinaqa, ¿imatana ruwasaqku? nispa. Paytaq paykunata nirqan:- Iskay p'achayoqqa mana p'achayoqman hukninta qochun, mikhunayoqpas chay hinallataq ruwachun, nispa. Contribución cobraqkunapas hamullarqankutaq bautizachikuyta munaspa, hinaspan payta nirqanku:- Yachachikuq, ¿imatana ruwasaqku? nispa. Juantaq paykunata nirqan:- Kamachisqaman hinalla cobraychis, ama astawanqa cobraychischu, nispa. Soldadokunapas payta tapullarqankutaq:- Ñoqaykuri, ¿imatataq ruwasaqku? nispa. Paykunatataq nirqan:- Ama pitapas manchachispaqa otaq yanqa tumpaspaqa imatapas qechuychischu, pagollaykichiswan contentakuychis, nispa. Runakunaqa makillañan suyasharqanku, chaymi Juanmanta sonqollankupi yuyaykurqanku: Icha, ¿paychu Diospa Akllasqan Cristoqa kanman? nispa. Chaymi Juanqa llapata nirqan:- Ñoqaqa unuwanmi bautizaykichis, ichaqa hukmi hamushan ñoqamanta aswan Wayrachinantan hap'ishanña, erasqantataq allinta ch'uyananta, hinaspan trigota taqenman waqaychanqa, pajatataq mana hayk'aaq wañuq ninapi kananqa, nispa. Chay hinatan Juanqa anchata anyaykuspa allin willakuykunata runakunaman willarqan. Hinallataq Juanqa kamachikuq Herodesta anyarqan wawqen Felipeq warmin Herodiaswan tiyasqanmanta, tukuy mana allin ruwasqanmantawan. Chaymi Herodesqa Juanta carcelman wisq'achirqan. Chaytawanpas lliw mana allin ruwasqanman yapaykurqan.

Manaraq carcelpi kashaspan Juanqa llapa runata bautizarqan, chaymantataq Jesustapas bautizallarqantaq. Jesús mañakushaqtintaqmi hanaq pachaqa kicharikurqan, hinan Santo Espirituqa urpi hina rikch'ayniyoq paypa altonman uraykamurqan. Huk kunkataq hanaq pachamanta nimurqan:- Qanmi munasqay Churiy kanki, qanmi anchata kusichiwanki, nispa.

Jesusqa yachachiyta qallarishaspanmi kinsa chunka watayoq hina karqan, runakunataq yuyarqan Josepa churin kasqanta. Josepa Elipa churinmi karqan, Elitaq Matatpa churin karqan, Matat-taq Levipa churin karqan, Levitaq Melkiq churin karqan, Melkitaq Janaq churin karqan, Janataq Josepa churin karqan, Josetaq Matatiaspa churin karqan, Matatiastaq Amospa churin karqan, Amostaq Nahumpa churin karqan, Nahumtaq Esliq churin karqan, Esliqtaq Nagaipa churin karqan, Nagaitaq Maatpa churin karqan, Maat-taq Matatiaspa churin karqan, Matatiastaq Semeinpa churin karqan, Semeintaq Josepa churin karqan, Josetaq Judapa churin karqan, Judataq Joanaq churin karqan, Joanataq Resaq churin karqan, Resataq Zorobabelpa churin karqan, Zorobabeltaq Salatielpa churin karqan, Salatieltaq Neriq churin karqan, Neritaq Melkiq churin karqan, Melkitaq Adiq churin karqan, Aditaq Kosampa churin karqan, Kosamtaq

Elmadampa churin karqan, Elmadamtaq Erpa churin karqan, Ertaq Josuepa churin karqan, Josuetaq Eliezerpa churin karqan, Eliezertaq Jorimpa churin karqan, Jorimtaq Matatpa churin karqan, Matattaq Levipa churin karqan, Levitaq Simeonpa churin karqan, Simeontaq Judapa churin karqan, Judataq Josepa churin karqan, Josetaq Jonampa churin karqan, Jonamtaq Eliakimpa churin karqan, Eliakimtaq Meleaq churin karqan, Meleataq Mainanpa churin karqan, Mainantaq Matataq churin karqan, Matatataq Natanpa churin karqan, Natantaq Davidpa churin karqan, Davidtaq Isaipa churin karqan, Isaitaq Obedpa churin karqan, Obedtaq Boozpa churin karqan, Booztaq Salmonpa churin karqan, Salmontaq Naasonpa churin karqan, Naasontaq Aminadabpa churin karqan, Aminadabtaq Adminpa churin karqan, Admintaq Arniq churin karqan, Arnitaq Esrompa churin karqan, Esromtaq Farespa churin karqan, Farestaq Judapa churin karqan, Judataq Jacobpa churin karqan, Jacobtaq Isaacpa churin karqan, Isaactaq Abrahampa churin karqan, Abrahamtaq Tarepa churin karqan, Taretaq Nakorpa churin karqan, Nakortaq Serugpa churin karqan, Serugtaq Ragaupa churin karqan, Ragautaq Pelegpa churin karqan, Pelegtaq Eberpa churin karqan, Ebertaq Salaq churin karqan, Salataq Kainanpa churin karqan, Kainantaq Arfaxadpa churin karqan, Arfaxadtaq Sempa churin karqan, Semtaq Noepa churin karqan, Noetaq Lamekpa churin karqan, Lamektaq Matusalempa churin karqan, Matusalemtaq Enokpa churin karqan, Enoktaq Jaredpa churin karqan. Jaredtaq Mahalaleelpa churin karqan, Mahalaleeltaq Kainanpa churin karqan, Kainantaq Enospa churin karqan, Enostaq Setpa churin karqan, Set-taq Adanpa churin karqan, Adantaq Diospa kamasqan karqan.

4

Jesumi Santo Espirituwan hunt'a Jordán mayumanta kutimpurqan, hinan ch'inneqman Espirituqa pusarikurqan, chaypitaq tawa chunka p'unchay kamurqan saqraq wateqasqan. Chay p'unchaykunapiqa manan imatapas mikhurqanchu, chaymantañan yarqachikurqan. Hinaqtinmi saqraqa Jesusta nirqan: Diospa Churinchus kanki chayqa, niy kay rumita t'antaman tukunanpaq, nispa. Jesustaq saqraman kutichirqan: Diospa Simin Qelqan nin: Manan t'antallawanchu runaqa kawsanqa, nispan, nispa. Chaymantataq saqraqa huk alto orqoman pusaspas, huk qhawariyllapi llapallan kay pacha suyukunata payman qhawarichirqan. Hinaspan saqraqa payta nirqan: Qanmanmi qosqayki tukuy kay kamachikuyta kay suyukunaq qhapaqkaynintawan. Ñoqan kay atiytaqa chaskirqani, chaymi pipas munasqayman qosaq. Qanchus qonqoriykukuspa yupaychaykuwanki chayqa, llapallanmi qanpa kanqa, nispa. Jesustaq saqraman kutichirqan: Diospa Simin Qelqan nin: Señor Diosniykitan yupaychanki, pay sapallantataqmi servinkipas, nispan, nispa. Chaymantataq saqraqa Jerusalén llaqtaman Jesusta pusarqan, hinaspan Dios yupaychana wasi pataman sayaykachispa payta nirqan: Diospa Churinchus kanki chayqa, kay ukhuman saltaykuy. Diospa Simin Qelqan nin: Diosmi angelninkunata kamachinqa waqaychanasuykipaq, nispa. Nillantaqmi: Makinkupin qanta chaskisunkiku chakiykita rumipi mana takakunaykipaq, nispan, nispa. Chaymi Jesusqa saqraman kutichirqan: Diospa Simin Qelqan nin: Aman Señor Diosniykita wateqankichu, nispan, nispa. Manapuni wateqayta atispataq saqraqa

Jesusmanta anchhuripurqan huk kutikama. Jesús kuterqa Galileaman, Jesusmi Santo Espirituq kallpachasqan Galilea provinciaman kutipurqan, chay muyuriq campokunapitaq paymanta rimarqanku. Diosmanta yachachinanku wasikunapin yachachirqan, Iliw runakunataq payta hatuncharqan.

Wiñasqan Nazaret Ilaqtaman rispataq, haykullaqpuni hinata samana p'unchaypi Diosmanta yachachinanku wasiman haykurqan, hinaspan Diospa Simin Qelqa leeq sayarirqan. Profeta Isaiaspa qelqasqanta payman haywaqtinkutaq k'uyuraspa kay qelqasqata tarirqan: Señor Diospa Espiritunmi ñoqapi kashan, wakchakunaman allin willakuykunata willanaypaqmi akllawarqan. Payqa kachamuwarqan presokunaman kacharisqa kanankuta willanaypaq, ñawsakunaman qhawarinankuta willanaypaq. Payqa kachamuwarqan sarunchasqakunata kacharinaypaq, Señor Diospa Ilaqtanta sumaq qhawarinan p'unchay chayamusqanta willanaypaq, nispa niqta. Qelqata k'uyuykuspataq waqaychaqman haywapuspa tiyaykurqan, llapa chaypi kaqkunataq payta makilla qhawasharqanku. Hinan Jesusqa paykunata nirqan: Kunanmi uyarishaqtiykichis kay Qelqa hunt'akun. Sumaq simikunata rimaqta uyarispan musphaspa Jesusmanta llapallanku allinta rimarqanku, hinaspan nirqanku: ¿Manachu payqa Josepa churin? nispa. Hinan paykunata nirqan: Imaynan rimaypi ninku: Hampikuq, kikiykita hampikuy, nispa, chay hinapaschá niwankichis. Capernaum Ilaqtapi imaymana ruwasqaykitan uyariyku, chay hinallataq kay Ilaqtaykipipas ruway, nispa. Jesusqa nillarqantaqmi: Cheqaqtan niykichis, manan mayqen profetapas Ilaqtanpiqa allin chaskisqachu. Cheqaqtapunin niykichis, profeta Eliaspa tiemponpin askha viudakuna Israelpi karqan, kinsa wata soqta killayoqta para mana chayaqtintaq hinantin Ilaqtakunapi hatun yarqay karqan. Chay hinaña kashaqtinpas Diosqa manan Eliasta mayqenninkumanpas kacharqanchu, aswanpas Sidonpi Sarepta Ilaqtapi viuda warmillamanmi kacharqan. Profeta Eliseoq tiemponpipas askhan aycha qarapi millay onqoyniyokuna Israelpi karqan, chaywanpas manan mayqenninkutapas Diosqa alliyachirqanchu, aswanpas Siria suyumanta Naamanllatan alliyachirqan, nispa. Chayta uyarispan Diosmanta yachachina wasipi kaqkuna sinchita phiñakurqanku. Hinaspan sayaripa Ilaqtamanta qarqorqanku. Chay Ilaqtatan ruwasqaku orqo patapi, chaymanmi qaqapachinankupaq aparqanku. Jesustaq ichaqa chawpinkuta lloqsispa ripurqan.

Galilea provinciapi Capernaum Ilaqtaman uraykuspanmi ,Jesusqa samana p'unchaykunapi paykunata yachachirqan. Hinan atiywanpuni yachachisqanmanta muspharqanku. Diosmanta yachachina wasipin supaypa ñak'arichisqan runa kasharqan, paymi kunkayoqta qaparirqan: ¡Waw! Nazaret Ilaqtayoq Jesús, ¿imataq ñoqaykuwan ruwanayki? ¿Tukuwaqniykuchu hamunki? Reqsiykin pichus kasqaykita, qanqa Diospa Kachamusqan mana huchayoqmi kanki, nispa. Jesustaq payta phiñarikurqan: ¡Upallay, lloqsiy paymanta! nispa. Chaymi supayqa runakuna chawpiman wikch'urparispan, mana imanaspalla paymanta lloqsirqorqan. Hinan llapa musphaspa ninakurqanku: ¿Ima simitaq kayri? Chaytaq supaykunata atiywan kallpawan kamachin, paykunaqa runakunamanta lloqsinkutaq, nispa. Chaymi tukuy muyuriq Ilaqtakunapi Jesusmanta rimarqanku.

Diosmanta yachachina wasimanta lloqsispataq Jesusqa Simonpa wasinman haykurqan, hinan Simonpa suegranqa sinchi fiebrewan onqosharqan, chaymi onqosqapaq valekurqanku. Jesustaq onqosqaman k'umuykuspa fiebreta phiñarikurqan, hinan fiebreqa thanipurqan. Hatarispan hinataq warmiqa paykunata servirqan.

Inti haykuytañan llapa onqosqayoy imaymana niraq onqoyniyokkunata Jesusman pusamurqanku, chaymi payqa sapankaman makinta churaykuspa qhaliyachirqan. Askha runakunamantataqmi supaykunapas qaparikuspa lloqsirqan: Qanqa Diospa Churinmi kanki, nispa. Jesustaq ichaqa phiñarikuspa supaykunata mana rimarichirqanchu, Diospa Akllasqan Cristo payqa kasqanta yachasqanku hawa.

Pacha illarimuqtiinmi Jesusqa huk ch'inneqman lloqsirqan. Runakunataq maskhaspa payta tarirqanku, hinaspan hark'arqanku paykunamanta ama ripunanpaq. Jesustaq ichaqa paykunata nirqan: Huk llaqtakunamanpas Diospa kamachikuq kananmanta allin willakuykunata willamunaymi, chaypaqmi Diosqa kachamuwarqan, nispa. Ahinatan Jesusqa Judío runakunaq Diosmanta yachachinan wasikunapi willaspa purirqan.

Recent Visitors

[Click to Get](#)  FEEDJIT